

Ina cumpletta surpraisa

Flavio Bundi surpiglia il post da schefredactor dad RTR

■ (ac) Cun l'elecziun da Flavio Bundi sco nov schefredactor da Radiotelevision Rumantscha ha il cussegl d'administraziun da la Societad svizra da radio e televisiun procurà per ina surpraisa. En il Grischun è il giuven politolog oriund da Glion plitost enconuschent sco dirigent e cumponist. Il post da schefredactor RTR è ina da las interessantas incumbensas publicisticas dal chantun Grischun. I ha dà bleras speculaziuns tgi che vegnia ad occupar la plazza suenter ch'igl è stà cler che la candidata u il candidat na vegnia betg ord chasa RTR, mabain che la suprastanza da la Societad purtadra dad RTR haja schlargià il radius da la tschertga. Il num *Flavio Bundi* aveva probablmain nagin sin la glista da las potenzialas candidatas u candidats. Ed er il nov elegì schefredactor RTR n'ha betg quintà cun l'elecziun, sco el ha tradì sin dumonda. Bundi sa legra fitg da l'elecziun e vesa en sia nova incumbensa la pussaivladad dad unir ses interess politics e culturals sco quels da la comunicaziun e da manar persunas. El ha ditg da nun esser stà a la tschertga dad in nov post. Sin dumonda saja el dentant stà pront da sa participar ad ina emprima runda instradada per la tscherna dal nov schefredactor. Actualmain è Bundi responsabel per il program dad easyvote. In project da la Federaziun svizra dals parlaments da giuventetgna. Via ils novs channels da comunicaziun sa sprova easyvote dad explitgar a moda simpla las fatschentas politics ed animar la giuventetgna da sa participar a la debatta politica ed a las votaziuns. Il nov schefredactor RTR ha titulà sasez per uffant da las novas medias e ch'el saja creschì si cun quella. Per comunicar e sentir il puls da la giuventetgna sajan ellas indispensablas. La lavur schurnalistica enconuscha Bundi nà da sia incarica sco collavuratur liber dal «Bündner Tagblatt» ed uschia saja la politica grischuna datiers ad el. Ses engaschi cultural sco cumponist e dirigent actual dal Chor mischedau Suraua e da kontra.cant, ina furmaziun da giuvnas chantaduras e giuvens chantadurs oriunds da l'entir Grischun, definescha el sco hobi.

Manar in grond manaschi

Manar publicisticamain in manaschi sco RTR cun prest 170 emploiadas ed emploiads valitescha Bundi sco la pli gronda sfida. El ha ditg da bain posseder enconuschientschas da manar equipas da persunas. Quai haja el già fatg durant ses engaschi tar la Garda papala e medemamain en sia incumbensa actuala sco manader da program tar easyvote. Bundi è creschì si a Glion, el ha frequentà la scolina rumantscha e silsuenter la scola tudestga cun singulas lecziuns rumantschas. Il bab è da derivanza lumneziana, la mamma gualsra. La affinitad al lungatg ed a la cultura rumantscha ha il nov schefredactor RTR per gronda part chattà entras sia lavur cumpositorica e cun sa fatschentar intensiv cun diversas rimas rumantschas. Satisfatg da l'elecziun dal nov schefredactor è il secretari da la Lia Rumantscha e president da la Agentura da novitads rumantscha *Martin Gabriel*. Medemamain surprais da l'elecziun ha el discurrì dad in ferm signal da resguardar ina persuna giuvna cun fitg bunas qualificaziuns professiunalas. Gabriel valitescha l'elecziun da Bundi sco emprova dad RTR da filar il contact tar la giuventetgna via ils novs meds da comunicaziun. Ed el è persuadi che l'elecziun saja ina buna basa per rinforzar la collavuraziun tranter RTR ed anr.



Dirigia a partir da l'emprim da november betg sulet il Chor mischedau Suraua, mabain sco schefredactor l'entira purschida publicistica dad RTR: Il giuven politolog Flavio Bundi.

FOTO Y. BÜRKL

■ PUGN DA VISTA

DAD ANDREAS CADONAU

L'elecziun da Flavio Bundi sco nov schefredactor dad RTR stat cleramain en l'ensaina da las midadas che l'entira branscha schurnalistica è suttamessa. Midadas che sa fan valair, forsa betg uschè ferm sco tar la sparta da print, era tar ils mediums da radio e televisiun. La giuventetgna banduna las vias tradiziunalas e s'infurmescha per gronda part

En l'ensaina da la midada

via ils novs channels. Las midadas en pir lantschadas e la direcziun da la via instradada è intscherta e brentinusa. Il model da fatschenta da las chasas edituras tradiziunalas croda dapart e las instituziuns dal dretg public ston medemamain sa stentar. A quels ch'i na reussescha betg da carmalar la giuventetgna en la bartga smanatscha in problem existenzial u in da la legitimaziun. Cler ch'ils meds da massa sa

sprovan dad engaschar persunas al timun cun ina tscherta affinitad tar ils novs meds da comunicaziun. Tschertgads n'èn actualmain betg schurnalistas e schurnalists sa cumprovads, publicists abels dad analisas fundadas e retschertgas extendidas. Tar la gasetta «Südostschweiz» han ins elegì avant in pèr onns ina nova schefredactura or da sumegliants motivs. Enteifer las grondas chasas edituras han ins

engaschè cuntinuadamain uschenumnadas corifeas da la digitalisaziun, ils blers engaschis en stads da curta durada. La risposta gista sin la digitalisaziun da la comunicaziun n'ha la branscha anc betg formulà. Sche Bundi chatta la risposta vegn ins a vesair, en scadin cas merita el sia schanza. Tant pli ch'el è pertschert che sia emprima gronda sfida sco persuna externa giascha en chasa RTR.